

Suenmak Mbanjranz

家乡的果园


Youq mbanjranz gou, miz aen suenmak gvangqlangh ndeu. Ndaw suenmak ndaem miz haujlai gomak, miz gobizbaz、gobingzgoj、gomakgam daengj, lij miz haujlai go gou mbouj rox baenzlawz heuh mingz gyoengqde.

Seizcin daengz lo, va ndaw suenmak angj hai, ndingnding heuheu, doxbeij gyaunde. Miz vadauz nding、valeiz hau、va byaekyouzcai henj, yinghdauz ndingfug, bizbaz henjrdw, aen' aen hunghwd venj youq gwnz go, hawj vunz myaiz rih.

Seizhah daengz lo, yawj! Naz gve mwncup haenx, aen dem aen gvehoengz luenzlulu ndoj youq laj mbaw, lumjbaenz miz di najmong. Lijmiz geij aen mbeihung caegcaeg loh

gyaeuj okdaeuj, lumj maqmuengh bouxndaemgve vaiqdi daeuj mbaet nei.

Seizcou daengz lo, haenx dwg aen geiqciat dajsou. Makbingzgoj、mak-sigloux、makndae、makit, lijmiz makcauj cungj baenz lo, dou daengx ranz bae ndaw suenmak cimz moq. Gak cungj mak venj youq gwnz go, hawj vunz myaiz rihdanghdangh. Gou gwn imq le nyaenx mbouj ndaej deng gij gingjsaek baihnaj yinx bae, ndithaemh ciuq youq gwnz gomak, mak lumj daenj le geu buh saek-henjgim nei. Lijmiz duz roeg ndeu mbin daengz gwnz gomak, cungj mbouj goq gij mauhnyinz seiqhenz bouxndaemmak guh haenx. Haenx couhdwg yungh daeuj hwk roeg,



gojnaengz de hix naemj cimz gij feih ndei neix ba.

Seizdoeng daengz lo, cou sou doeng yo. Nae roengz foenfoen, gomak bangj hwnj geu buhmoq saekhau, baenzhaenx seuqcingh、baenzhaenx hausak, couh lumj bawxmoq caj baehaq nei.

Gou ndiepgyaez mbanjranz gou, ndiepgyaez suenmak gyaunde mbanjranz, daegbied ndiepgyaez gij va mwncup gomak seizcin, gvehoengz lailai seizhah, gij mak laisou seizcou caeuq bawxmoq gyaunde bangj buhmoq seizdoeng.

(Yiz Ciyouj)



Godaengngoenz Caeuq Ndaundeiq

向日葵与星星

Gaxgonq miz godaengngoenz ndeu, de mbouj naemj daengx ngoenz humx aen daengngoenz cienq, de naemj gaij hangz, ngoenzngoenz doeng naemj sae naemj ngiengxgyaeuj couh ndaej raen ndaundeiq.

Hoeng, danghnaeuz de ngiengxgyaeuj, nyinz va de couh goenq lo.

Ngoenz neix banhaemh, godaengngoenz lumj aenbaez nei, naemj gij ronghgywng ndaundeiq, naemj gij laepyamj huzswnh gyangmbwn. Sawqmwh, roegyeyingh ma daengz henzgyawj de, roegyeyingh sing daemq naeuz: "Mwngz lumjbaenz yawj hwnjbae mbouj sim' angq." Godaengngoenz ngaekngaek gyauej. Da roegyeyingh lumj yawj rox simgei vunz nei, godaengngoenz roxnyinh simgei bonjfaenh couh lumj diuz gau yawj mbouj raen nei, dwg yienghhaenx raezrangh, lumjnaeuz caeux couh deng roegyeyingh daraeh yawj rox lo.

Gyanghaemh caemrwrwd, roegyeyingh youh cam: "Mwngz dwg mbouj dwg naemj yawj ndaundeiq?" Godaengngoenz geizheih ngaekngaek gyauej, mboujgvaq de mbouj caiq cam. Roegyeyingh angqyangz naeuz: "Neix guh ngaih, gou daiq mwngz mbin hwnj gyangmbwn bae!"

Gyoengqde yaek guh yezgigiuz, gyoengqde ra mbawfaex ndeu daeuj guh "lamz" yezgigiuz, youh ra mbaw baengz ndeu guh "gigiuz" yezgigiuz, gyoengqde lij ra diuz sihoj ndeu daeuj diemj feiz. Doeclaeng, roegyeyingh gamz di namh unqnyinh haeuj ndaw lamz bae, bang godaengngoenz haeuj lamz bae, diemjfeiz、hainduj mbin! Yezgigiuz dauqdaej youq gyanghwnz mbin coh gyangmbwn, mbin coh gij ndaundeiq ronghsagsag haenx.

(Liangz Cojwj)

Naemj Daengz Gienh Saeh Haenx, Gou Couh Heiqndat

想起那件事，我就生气

Neix dwg gienh saeh hawj gou heiqndat dangqmaz ndeu, hix dwg gienh saeh hawj gou siengsim dangq-maz ndeu.

Vanhvanh dwg duzma liuzlangh dwggyaez raixcaix ndeu, gou ciengz-seiz dawz doxgaiq hawj de, ciemh-ciemh, dou couh sug lo.

Gou gip de ma gueng, mbanj seiz dou caez doxgyaep, caez guh-caemz, hoeng de couhdwg mbouj ei haeuj ranz gou.

Gou cijndeij youq bakdou ranz gou guh aen rongz ndeu hawj de, de moix haemh youq gizhaenx ninz, gou dinghseiz bae sousib hawj de. Geij ngoenz neix aen dungx Vanhvanh ciemhciemh bienq hung lo, gou doeksat raixcaix.

Gvaq duenh seizgan ndeu le, de daihgaiq yaek roengz lwg lo, yiengh-neix gou aeu haujlai doxgaiq ndei hawj de gwn, hawj de lai bouj naengzliengh, roengz lwg cij mbouj baenzhaenx sinhoj. Hoeng gou mbouj rox cieq seng, yienghneix gou ra

daxmeh daeuj bang. Ndaej daengz gou caeuq daxmeh ciuqgoq, duzma roengz le 6 duz malwg iquetet.

Malwg ngoenz beij ngoenz maj-hung lo, gou caeuq gyoengq baengz-youh gou sim' angq dangqmaz. Vanhvanh hix rox goq lwg, malwg ngoenz hung gvaq ngoenz. Miz ngoenz ndeu, miz duz malwg ndeu mbouj raen lo, gou gaenjgip raixcaix, raen gwnz dieg miz di lwed, gou sikhaek mbouj miz muengh lo. Gou engq gyaek geij duz lij lw haenx.

Ngoenz ndeu, gou cuengqhag dauqma, gou heuh Vanhvanh, hoeng mbouj miz saekdi doenghdanh. Gou cingq geizheih, couh dingqny vnz seiqhenz naeuz aen doih hoenx ma daeuj gvaq, gaj dai Vanhvanh hojlien bae lo.

Dingq daengz neix, gou raemxda sikhaek doek lo, siengsim dangqmaz. "Vihmaz aeu gaj Vanhvanh bae, Vanhvanh youh mbouj haeb vunz." Gou heiqndat dangqmaz naeuz.

(Liz Ci'gyangz)

